

Barhafftige vnd erschreckliche Zeitung / Von dem grausamen Feindt dem Muscowiter / wie er dem König von Polen / mit einer grossen gewaltigen Macht ins Landt gefallen:

Item wie er eine grosse Festung / da vor er viel Volcks verloren / im sechsten Sturm eröbert / das Volck darinn jemmerlich erwürgen vnd hinwegt führen lassen.

Im



Jar

M.

D.

LXIII.

YYY/56



DER Muscowiter ist vor
wenig Wochen dem König
von Polen ins Land gefallen/
vnd hat eine Festung Polozki
oder Pleszki genant / so in Lit-
tawen xvi. meilen von der Wilde gelegen/
mit grosser gewalt im sechsten Sturm er-
öbert/die Stad ganz vnd gar gleich der Er-
den weg gebrandt / vber zwentzig tausent
Menschen jemerlich zu hacken vnd erwürgen
lassen / Vnd ist die Tyranny nicht auszu-
sprechen/so er an Frawen vnd Jungfrawen
vnd jungen Kindern hat vben lassen. Er
hat in die sechzig tausent Menschen / aus de-
nen daselbst angelegenen örten in die Mosche
getrieben/die Frawen vnd Jungfrawen alle
entblösset/vñ also nackt gebunden / gefangen
wegtreiben lassen/Darunter der Woywoda
oder Heubtman sampt seinem Weibe/denen
er das leben geschanckt/auch gewesen.

Vnd ist in denselben Landen solch ein
schrecken / das der fürnemeste Fürste in Lit-
tawen / Herr Nicolaus Radzauil genandt/
aus seinem Fürstenthumb geflogen/vnd das
selbige gar verlassen hat.

Nach

Nach solchem Sieg ist der Barbarische/
greuliche Feindt mutiger worden / vnd eilet
stracks auff eine andere Stadt in Polen/
Kioff genant / welche am wasser / Borische/
nes genant / gelegen ist / damit er den Polen
des orts / die Proniant entzihe / vnd die ar/
men Leute also weiter bezwinge / vnd in seine
gewalt bringe.

Er hat auch also baldt vierzig tausent
Tatern (denn er derselbigen sechzig tausent
bey sich hat) auff die Wilde geschicht / welche
auff zwelff meil weges lang / zur Stadt zu/
alles mit Feuer vnd Mord verheren vnd
verwüsten. Der meinung / sich hernacher
gleicher gestalt an dieselbige Festunge zu
machen. Vnter andern schrecklichen Zeitun/
gen zu entbieten / hat er dem König von Po/
len anzeigen lassen / Das er einen Todten
Sarcē bey sich führe / vnd wolle nicht ehe frie/
de halten / es were denn des Königs von
Polen / oder sein eigen Kopff / in denselbigen
Sarcē / so von Silber gemacht sein sol / ge/
legt.

Seine macht / darmit er jtz anzeuhet /
ist vber zweimal hundert tausent vnd sech/
zig tausent Man.

Von

Item hat Geschütz auff Redern in die
Tausent Stück / klein vnd gros / solch Geschütz
wirdt nit mit Rossen / sondern mit Mennern
geführt.

Von diesem schrecklichen Feind meldet
der heilige Prophet David / in seinen Psal-
men / Vnd lest sich ansehen / als würde er der
sichern Welt Rute sein / von der er etliche
Jar her / vn Betrachtet / seiner grausamen ge-
walt vnd wütereÿ / ist verachtet worden.
Der allmechtige Gott wolle im gnediglich
wehren. Vnd den grossen Potentaten /
Königen / Chur vnd Fürsten / im heiligen
Römischen Reich / die augen öffnen / das sie
zu ihres Vaterlandts rettunge vnd abwen-
dung / solchs schrecklichen Feindes mehr
vnd fleissiger / denn (Gott sey es
geklaget) bis hero gesche-
hen / betrachten.

